

JESUIT CENTRE FOR THEOLOGICAL REFLECTION

"Promoting Faith and Justice"

P.O. Box 37774

10101 Lusaka, Zambia

Tel: 260-211-290410

E-mail: jctr@jesuits.org.zm

fax: 260-211-290759

web: www.jctr.org.zm

October 2007

Kwimusha kufuma ku JCTR mu Kuunda na Kukeng'a kwa Kristu Yesu, Nkuli yetu!

Inashiki cheng'i ina mpinji mu chaka, yakutalila Nkuli, ina twazang'alalang'a hakwila chidika chakwinza kwa Nkuli ni Chamwinu chawantu ezhima ni ileng'aleng'a yezhima ina aleng'eli Nzambi mudi yena na lubanzhi kulonda wezhima wetu tudanzang'eni mu umi nikukeng'a kwa Nzambi.

Tudi na muzang'alu hakuyitemeshela awa mazu akutalila Nkuli munu mu 2007. Tunakuhweleli netu ichi chibalu chakunang'ula kwa Katolika ha umi ni shakaminu yawantu chikuyikwashaku nankashi mukulong'esha mazu mu mpinji inu yakukiswila yakuhembela Nkuli. Tuneluki netu awa mazu akuyiwahisha nakuyinzesha na yuma munahitimu kwesekezha na mudimu wenu wawu kabing'a.

Chinashiki kumatwetu hayaka inahitimu neyi awa mazu akwashang'anang'a nankashi bayi neyi mukutang'a mu ipompelu hohu wanyi, ilang'a nimu itenti, nimumabumba awanyikwenzi, mumabumba akudinza nimumalombelelu yaunka wamuntu.

Mazu amukutalila Nkuli muchinu chaka cha 2007, awa anakukeng'a aka JCTR nawu akwakwitiya ezhima mu Zambia atong'ozhokuhu anemeni ha yumiyi: Kutona nakudilong'esha kuhembela kwinza kwa Yesu, Chamwinu ni Nkuli, kulapila nikwima nyikabu yayiwahi, kuunda nyichima mulong'a Chamwinu chetu unakwinza, bayi kutiya womaku mulong'a Nzambi (Imanuweli) udi nanetu mpinji yonsu.

Tunasakilili a Fr Bernard Mallia, S.J., aku Sudan, awa anakunoka mu Zambia chayinu mpinji nakuzata nawaka JCTR, hakulong'esha awa mazu. Tunasakilili cheng'i akashikola aku St. Dominic's Major Seminary hakutukwashaku kunung'ulula awa mazu kufumisha muwundeli kuleta mu Lunda.

Tukuzang'alala nankashi kutambula nakutiya kutong'ozhoka kwenu hadawa mazu. Itong'ozhoka yenu hadawa mazu ikatukwashaku nankashi kulong'esha chiwahi akwawu kumbidi! Neyi mukukeng'a awa mazu ha soft-copy, tutemeshelenu e-mail ha jctr@jesuits.org.zm hela infojctr@jesuits.org.zm. Etu akwa JCTR tunayilebeleli netu mwikali akiswila, mwinzali na muzang'alu wamu kutalila Nkuli. Mudi mumalombelelu etu, ninenu mwenda mutulembelelaku. Lekenu chikuhwelelu chetu chileti chiyulu!

Nasakilili, Kuunda cha Kristu chikali nanenu!

Ami,

Simson Mwale

Coordinator

JCTR Church's Social Teaching Project

Kutang'a Kwatachi Isaya 2:1-5

Kutang'a Kwamuchiyedi Aroma 13:11-14

Nsang'u Yayiwahi Matewu 24:37-44

TUHINDUKENU NAKWIMANA ADILONG'ESHA

Mpinji yakutalila Nkuli diku kutachika kwa chaka cha malombelelu awakwakwitiya, a chipompelu. Chaka chezhima chemena hakulumbuluka kwa chikuhwelelu chetu mudi Kristu. Dichi etu munu mu Zambia tunakusambila kudilong'esha kushikizha Kristu iwu unakwinza hakachi ketu na muzang'alu weneni. Tudi namuzang'alu weneni mulong'a tweluka kulema kwa Kristu mukachi ketu. Diyona Nkuli atushikili ni Chamwinu chawantu ezhima ni kayi kezhima kana aleng'eli Nzambi kuhitila mudi yena nahadi yena kufuma kukutachika, kulonda wezhima wetu tuwani umi nikukeng'a mudi Nzambi. Ilang'a untu wetu, iwu wekala wakukang'ewa, unatweshi wanyi haunka wawu kukeng'a yayiwahi nakuhela yatama yonsu. Imu dimu twakang'ewang'a kukeng'a na lubanzhi lwa Nzambi, nanochu haunka wetu twakang'anyang'a kumwiluka Nzambi hela kwinzala na umi nakukeng'a kwindi. Hela chochu Nzambi watudiwulang'a wanyi, hela kudiwula aka kayi ketu waleng'eli nakukeng'a chikupu kulondetu twikali mukukeng'a kwindi nyaka yezhima.

Kutalila Nkuli chalala himpinji yakudifukula namuzang'alu wakushikizha nawu Wanta wa Kristu hakachi ketu mukuhanda kwetu kwefuku-hefuku. Wanta wa Kristu hichumanyi? Chinalumbuluki kubula kudibabela ching'a kweseka hamu, lubanzhi, nikukeng'a kwa Nzambi kwakukeng'a kumanisha kutama nikudihela izhi zhazhang'a untu wetu ni yonsu yayiwahi. Mulong'adi etu mu Zambia twatela kuzang'alala kushikizha Wanta wa Kristu? Mulong'a tunakukeng'a walala, nzhila, chezhezhi ning'ovu yakutukwasha kutwalekahu kulwa na yonsu yaletang'a kudimbana, kulwa na yezhima yatukang'eshang'a kukwasha antu akwetu ni nyikala yetu, kumanisha nikukabishang'ana ni ilwilu yezhima yakuhelang'ana yatamishang'a ni kwenyeka kuhanda kwetu netung'a detu.

Nanachu Kapolofwetu Isaya unakutulezha nindi: "Inzenu, tuyi ku mpidi ya Mwanta ...atutang'ishi zhinzhila mutwatela kwenda ...twendeng'a muchezhezhi." Paulu ni yena nindi, "Tulekenu yezhima ina twakeng'ang'a kwilila mumwidima; tuvwalenu chikobelu cha nzhita nakumwekana muchezhezhi." Ichi chikobelu cha nzhita anakutena Paulu diyi ng'ovu yakutukwasha kuleta umi wawuwahi, kuleta yezhima yakuhandisha antu kulonda ezhima ahandi chachiwahi, wena niwakwawu ezhima. Hakwilochu, Isaya unakumona kutulu nindi antu "antu aketang'a mpoku zhawu zhanyikwali kuzhihimpa kwikala matemwa awang'ombi; ni makung'awu kwikala mpoku zhamatahu." Ichi chinatweshi kumwekana neyi tukutachika kuleka chifwa nakutachika kwila ilwilu yakukang'esha yambu, kudizung'isha nikudidatilila munyikala yetu, mu itenti yetu, hakachi kawakatata niwakwamama, nimudi ana adinka kuzatila Nzambi, nimuzhinzhila zhezhiba zhetung'a detu da Zambia. Chikobelunyi chanzhita tunakukeng'akeng'a hakwila tuwani uswa munzhita yetu? Paulu nindi, "lekenu chikobelu chenu chanzhita chikali Mwanta Yesu Kristu." Chikobelu chanzhita cha Kristu diyu ng'ovu ya Spiritu ya Nzambi, Spiritu ya wumi, yakukeng'a, ni ulobu, izhi enzhili nakutwinka Yesu. Watwinkeli muntu hi muntu ni kwezhima kulonda atwinzhishi kwendang'a munzhila zhindi.

Nanochu Nzambi unakutwalekahu kutuhoshela wezhima wetu munyichima yetu kuhitila muyuma yedikang'a muwumi wetu ni mukuwaha kwa kayi uku twakundama. Ilang'a kubadika yuma yezhima iyi, wahoshang'a kuhitila mudi mwanindi wumu akeng'a Yesu Kristu iwu wasendeli kuhehela kwa untu wetu kulonda awuhimpi mukutukeng'a kwindi kwawana. Imu dimu atukoleshelang'a nang'ovu indi ya Spiritu wazhila kulumbulula nawu watukoleshang'a hakuzung'a nanyichidi yezhima ya nshidi kulonda tutachiki kukeng'a kwila yayiwahi muwumi wetu wezhima. Mukulondela chinjikinzhilu chindi, tukuhanda bayi unka wetu wanyi ilang'a mulong'a wawakwetu hamu niwena, neyochu tunakudinza kudi yena, ochu twatela kuzatila amanakwetu niwaweletu (Yowanu 13:15). Imu dimu muzhimbu wa antu zha Nzambi watela kutwalekahu mukukeng'a, kukwashang'ana hakwila tutwalekehu kudanakena ni kudinung'a mukuunda munyikala yetu neyi antu, mukwila chochu tudibombi na Nzambi ya Mwanta wetu Yesu Kristu.

JESUIT CENTRE FOR THEOLOGICAL REFLECTION

"Promoting Faith and Justice"

P.O. Box 37774 10101 Lusaka, Zambia

E-mail: jctr@jesuits.org.zm Website: www.jctr.org.zm

Isaya unakulezha antu zha Nzambi ahembeli namuzang'alu kwinza kwa Nkuli owu ayishikili. Mumpinji inu yakutalila Nkuli twatela kudilong'esha kukela chidika chakwanuka kuvwalika kwa Nkuli yetu, yena Imanuweli, ona wenzhili nakuvwala chikowa chawuntu wetu. Wenzhili kulonda Wanta wa Nzambi winzi hadetu kuhitila mudi yena nimukushimuna kwindi kwa Nsang'u Yayiwahi ya wamwinu kuhitila mumazu nimuyilwilu indi. Mulong'a wanizhi, yena amukanini nikumuzhaha mulong'a wanetu kudi ana asakwili kukundama kuwanta wanshidi nikufwa, kudidatilila nikudikabisha hakusang'uka kwindi mu afu kulonda ninetu twileng'a chochu. Nanchu etu akwakwitiya mu Zambia tunatweshi kuzung'a kulonda tuleti chihandilu chachiwahi, mfwetu yashikilamu kunyidimu, kuleta kweseka hamu chawantu, nakumanisha uzweg'i.

Mu Nsang'u Yayiwahi, Yesu unakwinyika kumpinjoyu umi wetu niwa kayi ukamana. Yena unakutulezha tutentami nakuzung'ila kumanisha yatama yezhima ni lwisu lwezhima lwatukang'eshang'a kwilila akwetu yayiwahi yakuleta kuunda nikudanakena nichihandilu chachiwahi chawantu ezhima. Kudihoshela chakudihuhumuna chaking'ang'a kukufwa. Ichi chinalumbuluki nawu chachiwahi kutiyilila akwetu. Ilang'a twalemeshang'a hohu umi wetu, chakubula kwakama chihandilu nikulema kwawakwetu antu.

Mu mpinji inu yakutalila Nkuli, etu aka Zambia twatela kushinshika chikupu itong'ozhoka yetu hadi akwetu antu, mu isaka yetu, mu itenti yetu, mumalung'etu nikunyidimu yetu. Twatela kulomba kulonda twinzali nang'ovu mukuleta kwanakena kwa Yesu kuyezhima kulonda twakamushikizhi na muzang'alu ona watuvwalikilili kulonda twakadibombi nindi muwanta wa kuunda iwu watachika dehi hanu hamaseki. Mumazu amu Masamu, nawu twakadanakenang'a nakudimwisha netu "Kuunda kwikala hadeyi!" Ochu twakadilezhang'a muwalala wezhima netu, "Nakeng'ang'a ushakami chalumbwa!"

MALWIHU AKUTONG'OZHOKAHU MU ITENTI

- Wanta wa Kristu udi neyi yumanyi, cheng'i nawa mulonga'di twatela kuzang'alala hakukashikizha wanta wa Kristu muni mu Zambia?
- Chikobelunyi cha nzhita tunakukeng'eka kulonda tufwomwoni nshidi yakudidatilila yatuzhing'uluka?
- Munzhilanyi Yesu atukwashang'a kukang'esha itong'ozhoka yatama munyichima yetu kulonda tuleti kuunda chacheni nikushika hamu mu yezhima?

CHISELA

Kwikali muntu umu nakukabisha akwau (antu awana). Hakutiya kudila kwau muntu wacheng'i enzi nakuyamwina ku chilumbu. Hakuyamwina, akutachika kuhang'ana nikuzang'alela hamu ne lung'a dezhima.

MALOMBELELU AWAKWAKWITIYA

- Eyi Mwanta, tunakulomba utwinki Spiritu wakukeng'a nakashinshi kulonda wezhima wetu, muntu himuntu, twendeng'a muchezhezhi nakuunda kweyi. Tunalembi ...
- Eyi Mwanta, tunakulomba netu wenzununi mesu etu tumoni kuwaha kwakushikizha wanta weyi iwu watukulang'a ku nshidi. Tunalembi ...
- Eyi Mwanta, tunakulomba netu utukwashi kukeng'elang'a akwetu antu chihandilu chachiwahi kuhitila mukwila nyidimu yakuleta chiyulu mumalung'etu. Tunalembi....

MULUNGU WAMUCHIYEDI WAKUTALILA NKULI – CHAKA A 09 DECEMBER 2007

Kutang'a Kwatachi Isaya 11:1-10
Kutang'a Kwamuchiyedi Aroma 15:4-9
Nsang'u Yayiwahi Matewu 3:1-12

BALUMUKENU NAKWIMA NYIKABU YAYIWAHI MUTAMBULI KRISTU NKULI YETU

Kulomba kwatachi lelu kunatutambika tufumishi yatama ina yatukang'eshang'a kushikizha Kristu namuzang'alu. Diwu mutambi unakututambika Yowanu Mupapatishi hakwila munzhila imu hela ikwau tuhimpini umi wetu, isaka yetu netung'a detu kwikala mpata yayiwahi. Tunatweshi awa malwihu ayedi: Lwatachi, Nkuli unakwinza nakwiladi? Lwamuchiyedi, yumanyi twatela kufumisha mu umi wetu nimwitung'a detu neyi tunakukeng'a chikupu kushikizha Kristu? Kwakula kwakusambila kudi ng'ana: Kristu unakwinza kulonda akoleshi spiritu yetu na Spiritu indi yaulobu hakwila tuyishishi nakuyula chiwahi shakaminu yetu nakashinshi na chiyulu. Wenzang'a chikupu nakututambika nakutukolesha kulonda tutwalikuhu kuzatila hamu na yena mukuhipa mwidima wamu umi nimwitung'a detu, mu untu wetu nimumalung'etu kutachikang'ahu dehi kuleta lubanzhi. Hakumanisha dinu ung'ezhi wetu hanu heseki, twakeng'ila na umi wawuha mu mpuhu indi ochu wakatushikizha muwanta windi. Twiluki netu kudila chamanishang'a chikalaku!

Eng'a mpinji yoyena inu twatela etu aka Zambia kutumba mbutu yayiwahi mu isaka wetu, mu itenti yetu, nimwitung'a detu kulonda kwaha nyikabu yayiwahi yayivulu yakeng'ewang'a muwanta wa Yesu, wanta mwekala walala. Mulong'adi Yesu wakeng'elang'a nindi tumweshi nyikabu yayiwahi? Mulong'a diyi watwinkang'a umi, watwinkang'a cheng'i mbutu yayiwahi kulonda umi wetu niwetung'a uyi kumbidi. Haneyi mpinji, kunatweshi wanyi kwikala nzala hela mpwila. Cheng'i kwosi wakudakamena ching'a hohu kwinzala nayonsu yayiwahi nakuzang'alala neyi china Mama Maliya, Mama ya Mwanta wetu Yesu Kristu, azang'aleli mukamina kindi kakusakilila hampinji Nzambi watumbili mbutu ya Mwanindi mwivumi dindi (Tang'enu Luka 1:46-55). Mbutu yakudakama nikuunda, kudanakena, ya luwi nikukeng'a, ina atumbang'a Nzambi mumaseki awushi awumi wetu, ina twatukumwinang'a neyena da nyidimu yetu, inatweshi kutachika kutwinka muzang'alu. Nyikabu yayu dichi chinjikizhila chacheni chakutalila kwetu chikupu netu yuma yezhima mudi Yesu Kristu inekali yayiha ni nyidimu yetu inatachiki dehi kuleta nyikabu.

Tufunti kulwihu lwetu lwamuchiyedi: Yumanyi twatela kufumisha muwumi wetu neyi tunakukeng'a chikupu kushikizha Yesu mukachi ketu? Neyi tunakukeng'a chikupu kwikala ashikilamu, akumanina kweseka ninomu atutong'ozhokela Kristu, twatela kufumisha yonsu ina yakuleng'a na mana awantu yabulang'a kuleta kavumbi kumuntu, kavumbi kana amuleng'eli naku yomweni Nzambi. Bayi tutenang'a nawakwetu netu: Eyi nanami kudihosesha ching'a mwizhamu! Tuhoshi hohu netu, kakavulu, twakang'anyang'a kwikala neyochi twatela mulong'a mana awantu hela awahi ng'ahi ekala akukang'anya, ching'a hohu neyi kudi kutwamena kwa Spiritu wa Kristu. Mwamweni, twatela kwiluka chiwahi yumanyi twatela kwila kulonda tuwani yumanyi yatufuntishang'a hanyima.

Cheng'i nawa, twakatweshi kuwana ng'ovu yakutachika chikupu kuhimpa yezhima ina yatama yatukabishang'a nakukabisha akwetu. Twatela kuyihimpa ikali yayiwahi kudi adi ezhima. Ichi chinatweshi ng'ahi kumwekana? Isaya natwinki kwakula hakumutena yena mesiya nindi: "Spiritu wa Nzambi wekala hadi yena, Spiritu wa mana, Spiritu wakukundezha na ng'ovu, Spiritu wakwiluka, wa woma wa Nzambi." Yesu Kristu, iwu wekala Izu ni Mana a Nzambi, wadilishili kwikala muntu nakushakama hakachi ketu nakusenda isenda yetu kulondetu tudanzang'eni nindi mumanindi ana atumweneshang'a nzhila nakutwinka ng'ovu hakwila tuwani uswa nikulema kwa untu wetu kuhitila mudi yena.

Tunatweshi ng'ahi kwiluka walala wa yitong'ozhoka yetu mukuleta kukwashang'ana mu isaka nimu itenti yetu? Tunatweshi kwiluka chiwahi chikupu neyi twikala adilong'esha kuhandununa itong'ozhoka

JESUIT CENTRE FOR THEOLOGICAL REFLECTION

"Promoting Faith and Justice"

P.O. Box 37774 10101 Lusaka, Zambia

E-mail: jctr@jesuits.org.zm Website: www.jctr.org.zm

ya Spiritu wa Kristu ni spiritu wamukwankhunye. Dinu tukwiluka ng'ahi netu anakututwamena ku Spiritu wa Kristu? Ching'a neyi tukutachika kutong'ozhoka nakuzata neyi yomwenindi Yesu Kristu, neyi tutachika kukeng'a yuma yayiwahi, yetu etu aweni ni anakwetu. Twatela chikupu kushaku muchima nankashi kudi ana akabakana hamulong'a wakwikala ambanda hela amayala, ana anabuli yakuda hela tuhu kudi yuma yayiwahi yayivulu yawantu ezhima mu Zambia, ni atwansi anakubula kuya kushikola hela kuwana nyidimu, hamu ni yuma ikwau.

Tuyenu tutali chikupu hayuma inamwekani mu Zambia katataka. Tuneluki chiwahi imu spiritu ya mukwankhunye yatukokang'a: Kuhlila muchifwa chakudikeng'a etu aweni muyuma yonsu, kuhlila mukuditiya nakusupisha nikudatilila akwetu, ni muzhinzhila zhikwau zhakumwekesha kudikeng'a hohu etu awenetu nakuleta kudibabela. Chinemeni hohu hakwila adilong'esha dehi kukeng'a antu akwetu, kwikala antu achisaka chimu, kulonda tudilong'eshi kushikizha Kristu hakachi ketu ni mumalung'etu. Hakwila neyi tuneli ng'ana, twakatachika kuhanda namwayila kulema cha muntu, kushakama mukutiyang'ana nikuunda, neyochu Isaya unakutumwekesha mu yifwanikizhilo yakuka kudambula kwezhima muwumi wetu, munyikala nimuzhindandanda zhetu. Anatumambiki tuyuli nakashinshi kwakubula kubabela akwetu neyi china Nzambi watumweshwa nikutukolesha.

Nanochu Paulu nindi bayi tudakamenaku hela kuleka kulwa nzhita yetu yakuleta kuwaha kuwumi wetu niwetung'a kulonda twikaleng'a amawahi azhila nawa. Tudi nachikuhwelelu netu ichi chinatwesheki, cheng'i nawa atushikachu dehi. Mulong'adi? Munzhilanyi? Mulong'a Nzambi yetu udi nanetu mpinji yezhima, wadilong'esha kutukwasha mwezhima. Watukwashang'a nankashi munzhila zhisatu: Yatachi, kumulondela yena neyi chinjikinzhilo chetu nakudovwahila nyichima nawakwetu; Chamuchiyedi, chakubadika nawa, hakumufwana yena twatela kutachika kuhanda nawakwetu neyi mabwambu bayi neyi akwankhunye wanyi; Chamuchisatu, cheng'i nawa chuma twatela kwila chikupu, hakumufwana nakwikala neyi yena twatela kudikehesha neyi ng'amba kudi akwetu antu, neyi china atumwenesheli Yesu muchinjikinzhilo chakuwelesha nyendu ya tumbanji twindi. Iwu diwu mudimu watukwashang'a kwikala adilong'esha kwakama umi wawakwetu kubadika wetu. Chalala, yomwenindi Yesu Kristu ni yena welili chochenochu!

Mu Nsang'u Yayiwahi lelu, Mateu nindi muchipapatishu asambilang'a kutupapatisha mumenzhi akufumisha itong'ozhoka yatama hadi akwetu. Ichi chipapatishu chatwenzunwinang'a chinsu kudi Yesu nikudi antu akwetu. Chipapatishu cha menzhi chatuwahishang'a kulonda tutambuli chipapatishi cha kesi nicha Spiritu. Ichi dichi chipapatishu ahitilumu yomweni Yesu ha kulusu hakutufwila nikutusang'ukila henohu tuchidi akwanshidi. Ichi dichi chipapatishu chabadika kulema, chatwinkang'a ng'ovu, muwana wa Spiritu ya Kristu, hakwila tutwalekuhu kwendang'a munzhila indi, kulonda neyi yuma yonsu inekali dehi yayiha, etu twakayuleng'a hamu na yena mu mpuhu indi, muwanta windi wa kuunda nikukeng'a, wachiyulu nakashinshi. Amen.

MALWIHU AKUTONG'OZHOKAHU MU ITENTI

- Yumanyi inatweshi kutukwashaku muntu himuntu hamu nimu itenti kwiluka walala wayitong'ozhoka nikusakula kwetu muwumi wetu ni muwumi wetung'a detu?
- Yumanyi yatukwashang'a kubula kudakamena, etu hamu ni malung'etu?
- Munzhilanyi chikupu twamwenang'a hela kutiya ng'ovu zha chipapatishu muwumi wetu mafuku anu?

CHISELA: Kwikali muntu umu ekali neyi muntu watama muchima nankashi mwilung'a, chitakwa wamukunkulu wakubula kashinshi. Ifuku dimu hakudihumang'ana namukwakwitiya, iwu ukumukwasha kuleka upapwoki windi nakwikala na kashinshi mwilung'a. Hakwila nabalumuki dehi, iwu wading'ileng'a chipapwoki hakufunta ku chisaka chindi nakutachika chihandilo chachiha chachiwahi.

MALOMBELELU AWAKWAKWITIYA

- Tunakulomba, eyi Mwanta, netu Spiritu atukwashi kwiluka walala kulonda kusakula kwetu kwikali kwalumbwa. Tunalembi ...
- Eyi Mwanta, tunakulomba ufumishi woma munyichima yetu kulonda tubuli kudakamena hela tuhu tunakubakana. Tunalembi ...
- Eyi Mwanta, tunakulomba utuwaminini mukushikisha yezhima ina twadishing'ili kwila muchipapatishu. Tunalembi ...

JESUIT CENTRE FOR THEOLOGICAL REFLECTION

"Promoting Faith and Justice"

P.O. Box 37774 10101 Lusaka, Zambia

E-mail: jctr@jesuits.org.zm Website: www.jctr.org.zm

MULUNGU WAMUCHISATU WAKUTALILA NKULI – CHAKA A 16 DECEMBER 2007

Kutang'a Kwatachi: Isaya 35: 1-6, 10
Kutang'a Kwamuchiyedi: Aroma 5: 7-10
Nsang'u Yayiwahi: Matewu 11: 2-11

WUNDENU NYICHIMA, CHAMWINU CHETU UNAKWINZA

Mumpinji inu yakuhembela nkuli, chipompelu china kukeng'a tulombi kulonda tukeli chidika cha kwinza kwa Kristu, nkuli yetu, nakukeng'a na muzang'alu, ichi tunakuswila kwakwihi nakuvwalika kwa Yesu. Etu aka Zambia tunatweshi kwila chochu neyi tukutong'ozhoka ha yamiyi: Kristu watukulang'a ku yumanyi, cheng'i nawa watukulang'a kulonda twili yumanyi? Kwakula kwaswayi kudi ng'ana netu wenzhili nakutukuula kuundung'u kulonda tuhandi neyi antu akasunuka anatweshi kuhanda chiwahi. Kamana izhi dizhu wanyi tunakukeng'a etu nawa nyanetu ni akwetu twadihata nawu? Mosi washili nshimbi ya Nzambi ku mesu awantu nakuyihula neyi anayitezindi nehi, neyi anakusakula kuhanda tahindi kufwa (Nshimbi ya muchiyedi 30: 19)? Kusakula nshimbi chikulumbuluka kusha wumi wawu wezhima mumakasa a Nzambi iwu mwini wumi. Kukana nshimbi chikulumbulula kusha wumi mumakasa awu bayi mudi Nzambi wanyi, hela tuhu kuhanda kwakubula kutalila hela chuma chimu.

Indetu, yumanyi chikupu tunakusakula? Nakuhweleli tukwakula neyi china a Isaleri abidikili nezu dimu nawu tunakeng'i kukuhwelela mu nshimbi ya Nzambi. Ilang'a dinu iku kwakula kwamuchiduwu kunakufuma kunyichima na maana etu tahandi kamazu hohu? Neyi tunakukeng'a kwakula muwalala, twatela kudihula malwihu ayedi: Lwatachi, tweluka ku yumanyi atela kutukula mu wumi wetu ha muntu ha muntu, mu isaka yetu, mu itenti yetu, ni mwitung'a detu da Zambia? Lwamuchiyedi: Mukuhanda kwetu ni wuume wetu, tweluka hela kwikala na kuna kukuhwelela, kukeng'a ni muzang'alu wafumang'a hakulondela Yesu Kristu, iwu wekala nshimbi yayiha, watukundezhang'a nikutukolesha kulonda twikali na wumi walumbwa?

Nanochi, hakwakula lwihi lwatachi – kuyumanyi tunakukeng'a Yesu Kristu atukuliku? Tusambilenu kutala ha yuma yinakilika mu Zambia. Kufumaha, tukutachika kuwana kwakula kwa lwihi lunapandami kudolu – yumanyi natulong'esheli Yesu kufuma hakutukula. Hakuzhimbula kwinza kwa Mesiya nkuli, kapolofwetu Isaya wapolofweteli yuma yina yamwini Yesu wateleli kumwenesha tumbanzhi twa Yowanu ochu ayitumini akamwihuli neyi: Diyona ahembeleleng'a tahindi yena wuchidi kwinza? Isaya wunakutukundezha nindi bayi tudakamena wanyi ilang'a tukoleshi makasa etu ni manung'u etu anakuzakama kulonda twikali na chipepa chachiha cha wumi. Kutaminina hela kukata kunatweshi kwikalaku, ilang'a na ng'ovu ya Nzambi izhi zezhima zhidi na wanta wanyi. Ilang'a unakukeng'a tusambili tahi kutala hachihandilu chetu chamazhili, imu twading'isha etu awenetu niwakwetu na mulong'a wa yilwili niyitong'ozhoka yakuluwa, nahakubula kwila yayiwahi yina twatela kwila. Twatela chatachi mu wumi wetu kumona yitong'ozhoka ni yuma yezhima ina yatamishang'a nyichima yetu ni ubwambu wetu mu ntang'a, hakachi kamabwambu, mu itenti, mumashikola, kunyidimu, mukusekashana heka tuhu mu nsang'u ye tung'a na chiyulu mundandanda hela mwi tung'a dezhima.

Mukwila chochu, tunakubidika na Masamu netu: "Kukwasha kwami kwafumang'a kudi?" (Samu 120:1) Tunatweshi kutachika kuwana mwakwilila hakwila twidiki mu winowu tunadimbili etu awenetu. Tunatweshi kutachika kuwana zhinzhila mwakukoleshela ubwambu ni untang'a wetu. Ilang'a tunatweshi kuhosha kwakubula kulaba netu yuma yezhimiyi tuneseki yamukunkulu. Kukwasha kwa nyichima yetu yakuhehela kudi hohu mu mazu awa: "Kukwasha kwami kukafuma kudi mwanta iwu ileng'i weulu ni seki!" Ichi dichi Isaya wunakutulezha nindi Nzambi diyi mesiya, diyi Kristu, diyi watatalilang'a chovu-chovu kulonda tweseki na ng'ovu yezhima kudifumisha mumazhili twading'izha dehi. Yena watumweneshang'a Nzambi na Chamwinu chetu Yesu Kristu imu abula kukang'anya kutukwasha. Watulezhang'a nawa ni yuma elilang'a ana amukuhwelela yena nanochu ashikishang'a mazwinda kwakubula kufwamu hela kamu. Hakwila chochu, twakendang'a na muzang'alu kwakubula

JESUIT CENTRE FOR THEOLOGICAL REFLECTION

"Promoting Faith and Justice"

P.O. Box 37774 10101 Lusaka, Zambia

E-mail: jctr@jesuits.org.zm Website: www.jctr.org.zm

zhakututiyisha sonyi, nanochi twakatachika ninetu kukundezha akwetu kulonda ni wena azang'alali, nankashi ana twakeng'a kubadika, antang'a zhetu, mabwambu ni itenti.

Tuyenu tutali iyi injikizhilo kulonda tumoni yumanyi yinatweshi kutwilila. Nzambi watwenzunung'a matwi etu mpinji yezhima twabulang'a kusha muchima kukukabakana kwawakwetu hela kuyitiyilila. Kufumahu, watukwashang'a kutiyilila ni kutiyishisha akwetu chiwahi. Wenzunung'a mesu etu hampinji yezhima twabulang'a kumona walala wa muzhinzhila zhatama tunakuhandilamu. Haneyi mpinji watukwashang'a kwendang'a munzhila indi yakuunda ni chiyulu kulonda wezhima wetu hamu ne tung'a detu da Zambia twendi chiwahi nakumanisha uzweg'i wezhima na kumona netu tunakudanzang'ena maheta etung'a chiwahi. Wakasunung'a madimi etu ha mpinji twamwenang'a kubula kuhosha na walala hakutama chinakumwekena chakudila antu hanyitu. Imu dimu atunyamwinang'a hakwila ninetu nawa tunyamuni akwetu nankashi ana adatilila adi neyi akwamama anakukabisha mu yisaka yetu munzhila zhamboka amboka zhidi neyi kubula kuya kushikola, ipateli, hela kuwana nyidimu. Wabalumunang'a nyidimu yetu ku antu twabula kwiluka, adi neyi antu afuma kumatung'a acheng'i, ana ahela munyikala ni ana adi na kabubu ka AIDS kulonda tutachiki kuyiking'a ni kuyihoshelaku. Chakukuminaku, watutang'ishang'a nikutukwasha bayi neyi hakwila tuleti nakuhemba anginga ni antuluwa a AIDS hohu nehi, ilang'a cheng'i kulonda tuhimpilila yilwilo yetu yatama yina yinatweshi kuleta kabubu ka HIV/AIDS.

Chikupu, iyi diyi injikizhilo ya yuma yantesha hela yamaneni ina anatweshi kwila ana ezhima akuhwelela enkawu ng'ovu kudi Yesu. Ching'a neyi tukutachika kwila nikumwekesha iyi injikizhilo dihu dinu tukeng'ila mu chawizha cha wanta wa Kristu. Iwu mudimu wunatachiki dehi nikusoka nyizhazhi nakwima nyikabu mudi etu ni mukachi ka Zambia. Indetu tukusakulahu yumanyi hakumona iyi yilwilo yakwinka wumi mu ng'ovu zha Mwanta Yesu Kristu zhinatweshi kuzata hela zhazatang'a hakachi ketu? Tukumushikizha Yesu na kwikala atumbanzhi twindi na kutwalekahu kuzata nindi hamu na muzang'alu ina injikizhilo tahindi? Yomweni Yesu watulezheli nindi kwakubula yena, etu tunatweshi wanyi kwila chuma hela chimuku, ilang'a neyi tudibomba na yena, tunatweshi hela kutuntula impidi yeneneni yakudidatilila ni kudikabisha. Awa diwu mampidi twashang'a hadi akwetu hela wasandang'a etu, diwu aleteshang'a woma kuwumi wetu ni kukayi ketu hamu tuhu ni mpata yetu.

Dinu lwihu ludi ng'ana: Tukutwalekahu ng'ahi naniwu mudimu wakudifumisha mu undung'u kulonda tuleti wanta wa Yesu wa chiyulu na kuwunda? Hadaha twatiyang'a woma hakuding'izha muniwu mudimu nochu wamwekanang'ana kukala. Kutang'a kwa lelu kwakufuma kudi Isaya wazhila kunakutulezha imu twatela kwila kulonda tubuli kutiya woma hela kutemuka lufuchi lwakwila tukang'anyi nikukang'aya. Chatachi, twatela kudinza kwikala na muchima wakuwunda, wakutalila chovu-chovu kwakubula kuleka neyi kunamwekani kukala hela cheneneni hela chantesha. Mpinji zhimu twatamininang'a neyi yuma yinakwenda chiwahi wanyi kwesekezha ninomu twayifukwilili hela neyi tunamoni wanyi nyikabu ya mavuli etu. Ilang'a mukudinza kutalila chovu-chovu mudi kudinza cheng'i kuhembela na ng'ovu zhetu zhezshima, kuhembela kutona kwetung'a ni kuhimpa kwa yuma yikwawu tunakusulwila mu malung'a etu mu Zambia. Anuke, etu aka Zambia, ochu tunakutalilila chovu-chovu mukukalakela kwikala na Nshimbi Yayiwahi?

Hakwila iyi yuma, tukumona chikupu netu twatela kumanisha ikonkozholo yezhima, hela tuhu ikonkozholo ya mu itenti yetu ina yinatweshi kutukang'esha kuya kumbidi. Iku kutoba hela kukonkozholo kunatweshi kumana ng'ahi hakwila etu tukasunuki nawakwetu? Chatachi, kunatweshi kumana neyi tukutachika kudinka kavumbi ni kutala akwetu neyi mabwambu bayi neyi akwankunyi. Muniyi nzihila, tukutachika hamu kukeng'akeng'a mu walala na kukeng'a mwakumanishila yezhima ina yatuhandunung'a nakumona netu tunakuzatila hamu nakuleta kuwaha ku muntu wezhima. Ching'a kutalila kwakubula kuzeya hohu diku kunatweshi kutukwasha kubula kudakamena muniwu mudimu waulehi wakuleta kuwunda na chiyulu. Kubadika kwikala na woma, etu tukumika cheng'i nawa tukazeya wanyi neyi hohu tukuleka wanyi kukuhwelela mudi Yesu iwu washinda dehi ng'ovu zha mwidima, cheng'i nawa watwalekang'ahu kutumunyikila nzihila yetu nakutwinka isenda yahepuka.

JESUIT CENTRE FOR THEOLOGICAL REFLECTION

"Promoting Faith and Justice"

P.O. Box 37774 10101 Lusaka, Zambia

E-mail: jctr@jesuits.org.zm Website: www.jctr.org.zm

Eng'a, imu dimu twatela kumika nikukanisha makabi, madilu, kukabisha hela kudatilila akwetu. Iyi diyi hohu nzhila yakwilukilamu netu tunatachiki dehi chidika cha kwinza kwa chamwinu chetu twakeng'a, Yesu Kristu. Tukulung'a nakukeng'a na kusakilila, na muzang'alu waweni chikupu.

MALWIHU AKUTONG'OZHOKAHU MU ITENTI

- Yumanyi yatuzhing'uluka tunamoni kwatwamwinang'ayi Kristu, cheng'i watwamwinang'adi?
- Mosi walezheli antu kusakula hakachi ka wumi ni kufwa. Yumanyi tunakusakula mu isaka yetu, mu itenti ni mwitung'a yakumwekesha nawu tunakusakula chikupu wumi?
- Lelu dimu mu Zambia yetu, wanta wa Kristu wudi na mazwinyi akukundama ku nsan'gu yetung'a na chiyulu?

CHISELA

Muntu wumu ekali neyi mukwakuyanda wakulomba-lomba, nasendi ni chisenda chalema. Ihita nzhila umu hakumuhumang'ana, ukwimana nakumuwelesha nikumudisha. Una mukwakuyanda ukuya kwindi namuzang'alu na chiseki.

MALOMBELELU AWAKWAKWITIYA

- Tunakulomba, eyi Mwanta, netu utwanzishiku yumanyi wenzhili nakutwamwinaku kulonda ninetu twinzishi akwetu kwiluka wamwinu walala. Tunalembi...
- Eyi Mwanta, tunakulomba netu utwamini itenti yetu yisakuleng'a yuma yakuleta wumi mpinji yezhima. Tunalembi...
- Eyi Mwanta, tunakulomba netu twikali yimwenu ya wanta weyi, yimwenu ya kukeng'a, yakuunda, ya chiyulu ni ya muzang'alu. Tunalembi...

MULUNGU WAMUCHIWANA WAKUTALILA NKULI – CHAKA A 23 DECEMBER 2007

Kutang'a Kwatachi: Isaya 7: 10- 14

Kutang'a Kwamuchiyedi: Aroma 1:1-7

Nsang'u Yayiwahi: Matewu 1:18-25

BAYI MUDAKAMENAKU, NZAMBI WUDI NANETU

Nyilungu yantesha yinahitimu, kukutachika kwa mpinji yakutalila Nkuli, izu da Nzambi datuhindwili nakututambika kulonda twiluki kulema kwakutukula kuyuma yinakutukabisha mu Zambia lelu dinu. Nanchu tunatweshi kudilong'esha mwamweni kulonda tukamushikizhi Kristu iwu wunakwinza nakutwamwina. Unu mulungu wakukuminaku unakutukwasha kumona yumanyi twatela kwila hanoyu mpinji tukuhinduka. Twatela kuditala mu nyichima yetu ni hanzi hetu kulonda ochu tunakweseka kudilong'esha, tudanakeni chalala kuyuma tuneleng'a yakutamisha ubwambu wetu etu aweni niwakwetu. Mulong'ochu chatwenzelang'a kumesu a Nzambi nikudi antu akwetu. Hakwila tunatachiki dehi kulapila, tunatweshi kumona chumanyi tunakukeng'ewa Kristu kwinza mu umi wetu nakutuka hamu netung'a detu. Hanu dihu dinu tukutachika wezhima wetu kuunda nyichima netu, kukumininaku, tunakushikizha Chamwinu chetu iwu unakwinza kulonda tuhwimi cheng'i chachiwahi nakuzang'alala netu yuma dinu inoloki chiwahi munzhila yayiwahi. Ilang'a hela chochu, tunading'i nakuzata nang'ovu nakwolola ihandilu yetu. Chakubula kumba mpinji, tukumona netu kwosi nozhu tunakwila, tunakukang'anya hohu mpinji yezhima chakutuletela nikukeng'a kuleka.

JESUIT CENTRE FOR THEOLOGICAL REFLECTION

"Promoting Faith and Justice"

P.O. Box 37774 10101 Lusaka, Zambia

E-mail: jctr@jesuits.org.zm Website: www.jctr.org.zm

Imu dimu twatachikang'a kunata chikuhwelelu neyi kuhimpa kwakuwahi kunatwesheki wanyi hela kushimbulaku. Mukuwana tukutachika kuhosha netu, talenu ipompelu yetu, nfulumendi ni antwamina zhetu, yumanyi anakutwilila hamu netung'a detu hakwila twikali antu awunda achiyulu chakuleta kuhembewa nikulemesha nsambu zhawantu? Kwezhima kutudi tunakutwalekahukumona mazhika kanwa, kufwila kwikala muchiyulu, kukabisha akwamama ni antwansi. NANOCHU tukutachika kudakamena, mulong'a kudetu kwitiya kudi hohu kwakutwinka kamuzang'alu kanti chakubula kutwakwasha mumakabi etu aweni. Hanu dihu izu da Nzambi lelu dinakukeng'a chikupu tutali hauntu wetu nakumona chalala neyi tudi na chikuhwelelu tahindi nehi, hela kumona chikuhwelelunyi tudi nachu. Mumpinji yamuchiduwu yakuleta woma ku chikuhwelelu chetu, izu da Nzambi denzang'a kudetu munzhila zhiyedi, kukuhwelela hela kubula kukuhwelela, kutalila hela kubula kutalila. Munzhila ikwau, twatela kwila neyi Mwanta Ahaza iwu tunatiyi mudi Isaya, tahindi neyi Yosefu iwu tunamoni mu Nsang'u Yayiwahi ya Mateu?

Tutalenu chatachi hakuzeya kwa Mwanta Ahaza hakuvulamena muzhimbu wa antu zhindi, muzhimbu wa antu kwanuka Nzambi hakuyihemba mpinji yezhima nikuyikwasha mu mpinji ya makabi ni mpinji umi wawu wadileng'a mukukala. Ichi dichi chading'i chihosha cha chikuhwelelu chawaYudeya ezhima, chihosha atelili kulondela mafuku ezhima. Ilang'a Ahaza wakuweleli mukukwasha kwa Nzambi wanyi, yena wakuweleli mung'ovu zhindi zha untu nihadi mabwambu zhindi amukunkulu hohu amuletsheli nikusaula Nzambi indi.haumona nindi yuma yezhima inamubalumukili ni ana mabwambu zhindi anamushiya nkawindi, kutalila kwindi kwamanini chakwila wakanini nikufunta kudi Nzambi. Ilang'a Isaya hakukang'anya kukundeza Mwanta Ahaza na antu zhindi kulonda omiki, wataminini nankashi hakumwinka Ahaza chimwenu chakumwekesha nawu, yuma yamwekanang'a kukala ku antu yekala yaswai kudi Nzambi. Wamwinkili chimwenu cha muzhiki wamumbanda ukavwala mukeki akatenawu nawu Nzambi udi nanetu, diyi Imanuweli. Ichi chading'ili chakumwanukisha nindi neyi ukukuhwelela mudi Nzambi yena ukamwamwina antu zhindi nikukukala kwezhima. Ilang'a Ahaza wakanini kwitezha china chimwenu, nanochu yena ni antu zhindi aying'izhili muundung'u mu Babylona.

Ilang'a Nsang'u Yayiwahi inakumweshwa muntu wacheng'i kubadika Mwanta Ahaza wakubula chikuhwelelu. Iwu iyala diyi Yosefu, iyala walumbwa, iyala wachikuhwelelu. Yena wamweni kukala kwakweni hampinji akeng'eli kuleta muzhiki Maria kwitala dindi kwikala ng'odindi. Chatweshekeli ng'ahi Maria kudibana kudi Yosefu nakumutiyaisha nsonyi hakuwanyika na mwana wamuwuvumbi? Yosefu chamukalilili kwiluka hela kutiyishisha yading'i nakumumwekena. Ilang'a chakubula kudisambisha yomweni nakumukana hatoka, kwesekeza na nshimbi muyuma yamuchidona, yena wasakwili kubula kumutiyaisha nsonyi nakumuwombola kumutwala kwawu kwakubula antu kwiluka. Hela chochu, wamukeng'eli nakumusha muchima chikupu. Ilang'a hana dinu dihu hanatweshi kukumina mana hela kuwaha kwawantu. Chochimu hohu watiyili neyi chuma china chinawahi wanyi. NANOCHU washalili nakutong'ozhoka nankashi mulong'a wachimweni chaswai wanyi kubula kumukuhwelela Maria. Hakumona kutoha kwa chikuhwelelu cha Yosefu, Nzambi watwesheli kumulumbulwila yezhima mu chilota. Chalala, Nzambi wekala wadilong'esha mpinji yezhima kutukwasha kuwana mwakumanishila kukala kwetu hampinji neyi mpinji tweekalang'a na kukala kwakwila ni mesu bwii nikutukang'esha kwolola yuma yinaheng'i. Usoku udi neyi chifuha, watokang'a wanyi. Nzambi ukwikalang'a nanetu muyuma yezhima mpinji yezhima.

Chikuhwelelu cha Ahaza chakang'ewi hakumwinka chimwenu chakwamwina kwa Nzambi hela tuhu muyuma yabadika kukala. Ilang'a chikuhwelelu cha Yosefu chading'i chakudihana hatoka, hakwila hela mwayila ng'ovu zhawantu, yena wachimweni chaswai wanyi kwiluka hela kutiyishisha yading'i nakumumwekena. Yosefu, hakumumwenesha kudi Nzambi kukala kwindi, yena walekeli kuzhinauka kwezhima hehenohu nakumusenda Maria kwitala dindi neyi ng'odindi. Wetezheli nindi yuma yamwekanang'a kukala kudetu, yekala yaswai kudi Nzambi. NANOCHU, mulong'a wanetu hamu nanetu – cheng'i bayi neyi kwakubuletu – Kristu ukelisha akwakayi ezhima kutwalekahu na mudimu wakuleta kuunda ni chiyulu mumbadi zhezima zha umi.

Isaya wapolofweteli ochu Wanta wa Nzambi wekala wahaya nyaka bayi neyi wawantu wakwila chanti hohu kunahu unafwi. Yesu wayikomwesheli nankashi akulumpi zhawa Isaleli ading'i nakutalila mesiya waheseke wakwinza nakutwalekahu wanta wawu waktung'a nang'ovu zhawantu. Hohamu

JESUIT CENTRE FOR THEOLOGICAL REFLECTION

"Promoting Faith and Justice"

P.O. Box 37774 10101 Lusaka, Zambia

E-mail: jctr@jesuits.org.zm Website: www.jctr.org.zm

neyi Ahaza, shimbu kanda wena, akanini kumutambula nakumwitezha yena Imanuweli, Nzambi udi nanetu, mudi Yesu. Amumweni nakumutiya kuhosha kwindi ninochu azatileng'a nang'ovu ya Nzambi mudi yena, kutung'a mukukuhwelela, mukutalila nimukukeng'a, Wanta wa lubanzhi na kuunda, wa chiyulu nikukeng'a. Iwu diwu mutu wansang'u lelu: "Bayi mudakamenaku! Nzambi udi nanetu!" Lelu dinu mu Zambia, khala mpinji neyi tukukuhwelela hohu hamatalenta etu nakwila yezhima kwesekezha na manetu, twiluki netu kwosi ninoku tunakuya!

Munzhilanyi tunatweshi kutachika kudanzang'ena hamu yuma yetu yayiwahi atwinkeli Nzambi wezhima wetu hakachi ka ana akanyama ni ana azeya, ana ekalaku namwau ni ana ela chikasa munshingu? Munzhilanyi tunatweshi kwikala na ilwilu ya nsang'u yetung'a na chiyulu ni yakusekashana yakuleta kuwaha ni chihandilu chakushikilamu kumuntu wezhima? Kwakula kudi hohu kwaswai – neyi china yading'i kudi Yosefu iyala wakwoloka – twatela twitezhi netu Nzambi udi nanetu, hiwetu, Yesu Kristu diyi Imanuweli, netu wawwalikili chikupu kudi Maria ng'amba wadizoza. Chamwekeni kukala, chabalumukili kwikala chaswai kudi Nzambi. Ichi chalala chikupu ni lelu dimu mu Zambia! Mulong'a Yesu iwu Nkuli yetu nenzi nakutulezha nindi: "Hiyami, bayi mutiya womaku!"

MALWIHU AKUTONG'OZHOKAHU MU ITENTI

- Yumanyi yatwilishang'a kuleka hela kunata chikuhwelelu chetu mu mpinji yamakabi mu isaka yetu, mu itenti yetu, nimwitung'a detu da Zambia?
- Mukukala kwau, Ahaza wading'i nachikuhwelelu mudi Nzambi wanyi, ilang'a Yosefu wading'i nachikuhwelelu cheneni mudi Nzambi. Eyi neyi eneng'ili mukukala wakuwelelang'a mudi Nzambi tahindi neyi, munzhilanyi wamwekeshelang'a chikuhwelelu cheyi?
- Chumanyi chalema munadinzi mukunu kutalila Nkuli kwamu 2007, munzhilanyi chikumukwashila mu 2008?

CHISELA

Muntu umu ekali Yosefu, mukwau ekali Maria. Yosefu hakumona nindi Maria nemiti, natong'ozhoki kumuseng'a. Kang'elu hakumwendela. Hakwitezha nindi Nzambi unakukeng'a kumanyisha mudimu mudi Maria, mudimu una ahosheli kuhitila mudi kapolofwetu Isaya. Nazang'alali chacheni!

MALOMBELELU AWAKWAKWITIYA

- Tunakulomba, eyi Mwanta, netu tukuhwelelang'a mudeyi, tubuli kudakamena mumpinji yamakabi munyikala yetu, mu itenti, mu Zambia. Tunalembi ...
- Eyi Mwanta, tunakulomba utwinki spiriti wakukwasha ana anakukabisha kulonda tuyamwini. Tunalembi ...
- Tunakulomba, eyi Mwanta, netu tukushikizhi mwamweni na muzang'alu mu nyichima yetu ni munyikala yetu hefuku da kuvwalika kweyi. Tunalembi ...